

योग दिवस प्रधानमंत्री

चौथा अंतर्राष्ट्रीय योग दिवस आज देस विदेस म मनाय जात हे। प्रधानमंत्री नरेन्द्र मोदी के अगुवई म उत्तराखंड के देहरादून म हज्जारों लोगन मन ह योग करीन। ऐति प्रदेस म घलो चौथा अंतर्राष्ट्रीय योग दिवस ल करीबन एक करोड़ लोगन मन एके संघरा करके नवा रिकार्ड बनाए हे। स्कूल महाविद्यालय अउ दस हजार ग्राम पंचायत के संगे संग आने-आने संस्था मन म योग गुरु के अगुवई म योगा अभ्यास करे गीस।

राजधानी रईपुर के बलबीर सिंह जुनेजा इंडोर स्टेडियम म राखे गे मुख्य कार्यक्रम म केंद्रीय बिजली राज्यमंत्री आर.के. सिंह अउ मुख्यमंत्री डॉक्टर रमन सिंह के संगेसंग करीबन छै सौ स्कूली लईका मन एके संगरा योग करीन। कार्यक्रम म केंद्रीय मंत्री आर.के. सिंह ह कीहिन कि पाछू चार बछर म प्रधानमंत्री के परयास ले विश्व म योग करइया मनके संख्या बाढ़ गेहे। ओमन छत्तीसगढ़ म सामूहिक योग के नवा रिकार्ड बनाय उपर मुख्यमंत्री के संगेसंग लोगन मन ल बधाई दीन। ए मउका म गोल्डन बुक ऑफ वर्ल्ड रिकार्ड के प्रतिनिधि संतोष अग्रवाल ह नवा रिकार्ड बनाय के परमाण पत्र मुख्यमंत्री ल दीन।

एति राजभवन म घलो आज बीहनिया अंतर्राष्ट्रीय योग दिवस के मउका म योग शिविर राखे गीस। ए मउका म राज्यपाल ह अपन संदेश म जम्मों लोगन मन ल रोजे योग करे के अपील करीन। उहें नवा रायपुर के योगा सेंटरल पार्क म केंद्रीय सशस्त्र बल के एक हजार ले जादा जवान मन योग करीन। ए कार्यक्रम केंद्रीय रिजर्व पुलिस बल सीआरपीएफ डहार ले नवा राजधानी विकास प्राधिकरण के मदद ले होइस। कार्यक्रम म सीआरपीएफ के महानिरीक्षक संजय अरोरा, डीआइजी अजय मिश्रा के संगेसंग जम्मों विभाग के करमचारी अउ अधिकारी मन योग करीन।

केंद्रीय मंत्री समीक्षा/प्रेसवार्ता

केंद्रीय बिजली अउ नवीकरणीय उर्जा राज्य मंत्री आर.के. सिंह ह छत्तीसगढ़ म उर्जा के क्षेत्र म होय बढ़िया काम के प्रशंसा करे हे। आज रायपुर म पत्रकार मनले गोठबात करत ओमन कीहिन कि इहा के सरकार ह राज्य म बिजली के विकास बर पाछू पंद्रा बछर म बढ़िया काम करे हैं। एखर ले दूसर राज्य मन ल घलो प्रेरणा मिलत हे। ओमन बताइन कि केंद्र सरकार ह बिजली बउरइया मनके घर, दुकान अउ उद्योग मन म स्मार्ट मीटर लगाय के घलो निर्णय लेहे।

केंद्रीय राज्य मंत्री ह सौर सुजला योजना अउ दूर दराज के जगा मन म सौर उर्जा ले बिजली पहुंचाय के छत्तीसगढ़ सरकार के योजना ल मॉडल बतावत दूसर राज्य मन ल घलो अपनाय के बात कीहिन।

अजय चंद्राकर-सुपेबेड़ा

गरियाबंद जिला के सुपेबेड़ा के संगेसंग तीर तखार के गांव मन म लोगन मन म किडनी रोग के समस्या ल देखत देवभोग सामुदायिक स्वास्थ्य केंद्र ल जल्दीच पचास बिस्तर वाले बनाय जाही। स्वास्थ्य मंत्री अजय चंद्राकर ह रायपुर म विभागीय समीक्षा बइठका म बताइन कि ए केंद्र म जल्दीच डायलिसिस मशीन के सुविधा घलो मिलही। इहा किडनी के बीमारी के बारे म चेन्नई के विषय विशेषज्ञ मन ले घलो पूरा जानबा दे जाही।

महासमुंद/दंडाधिकारी जांच

राज्य सरकार महासमुंद जिला म पाछू उन्नीस जून के निर्दलीय विधायक डॉक्टर विमल चोपड़ा अउ उखर कार्यकर्ता मन उपर पुलिस बल परयोग के मामला के दंडाधिकारी जांच कराय के फैसला ले गेहे। डिप्टी कलेक्टर अउ कार्यपालिक दंडाधिकारी ल जांच अधिकारी बनाय गेहे। ओमन ल एखर रिपोर्ट एक महीना के भीतर देके निर्देश दे गेहे। जानबा के मुताबिक ए घटना म विमल चोपड़ा अउ सात झिन पुलिस कर्मी के संगेसंग बारा झिन लोगन घायल होय रीहिन।

कांग्रेस किसान जन संकल्प यात्रा

किसान मनके कतकोन समस्या ल लेके प्रदेश कांग्रेस ह आज राजनांदगांव ले प्रदेशव्यापी प्रदर्शन के शुरूआत करीन। पार्टी के प्रदेश अध्यक्ष भूपेश बघेल के अगवई म किसान जनसंकल्प यात्रा निकाले गीस। ए यात्रा म कांग्रेस ह प्रमुख रूप ले मजूर, किसान मन ल खाद, बीजा, बोनस, सूख राहत अउ फसल बीमा के समस्या ल उठाइन।

चुनाव तैयारी

भारत निर्वाचन आयोग ह प्रदेश म अवइया विधानसभा चुनई बर प्रशासनिक तियारी शुरू कर देहे। ए बारे म काली रायपुर म एक टिन राज्य स्तरीय कार्यशाला राखे गीस। जेमा अधिकारी मन ल इलेक्ट्रानिक वोटिंग मशीन अउ वोटर वेरीफाएबल पेपर ऑडिट ट्रेल – वी.वी. पैट के मशीन के बारे म जानबा दे गीस। कार्यशाला म राज्य के मुख्य निर्वाचन पदाधिकारी सुब्रत साहू अउ आने प्रशासनिक अधिकारी मन आय रीहिन।

एनएमडीसी विक्रेता सम्मेलन

राष्ट्रीय खनिज विकास निगम—एनएमडीसी डहार ले बस्तर जिला के नगरनार म जल्दीच शुरू होवइया स्टील प्लांट बर गुणवत्ता वाले जीनिस पहुंचइया विक्रेता मनके सूची तियार करे जाही। एखर बर काली रायपुर म विक्रेता सम्मेलन के आयोजन करे गीस। ए सम्मेलन म करीबन दू सौ पचास डिन विक्रेता मन आय रीहिन। नगरनार के ए इस्पात संयंत्र ह एसो के आखिर तक चालू कर दे जाही।